

مجموعه ابو الضربا

ماسوا شابه سندن دلی تفسیره چالش
بر تو حکمت و عرفان ایله شویره آتش

هر ماه عربی ابتداسیله اون بشنده نشر اولتور فنون مجموعه سیدر

جزو ۴۳ [غره ربيع الآخر سنه ۱۳۰۲] نسخه سی ۳ غروش

مقدمه جلال

—۰۰— [۴۲ نجی جزو دن مابعد]

اوز بک ایله اورخانی و نورالدین منشینک یالکز نامرلیله ملک نصرتک
غیاث الدینه برقاچ لقردی سویلدیگی و آنک طرفدن اعدام اولندیغی و مهر
جهانک نکاحنده قوام الدین بغدادینک مخالف و عز الدین قزوینینک مروج
بولندیغی تاریخده وار ایسه ده موضوعک صورت جریانه اولان اشتراکلی
صرف محصولات فکریه دن و قطب الدین و سلمان و جابر و مبارک اشخاص
مفروضه دندر .

قادیلره گنجیه نیره نک شخصی بالطبع تمامیه ترجمه حالی صرف مخیل
اوله رق بوگادائر بعض فرنک تاریخلرنده کور یلان روایت یالکز جلال الدینک
سند نهرندن کچرکن اولاد و عیالی ایله تلف ایلدیگندن عبارتدر .

تاریخلر غیاث الدینک والده سی اولان و او یونده زاهره تسیمه اولنان
بیچاره نک براق حاجب طرفدن نکاح ایله ایستلدیگی و ابتدا مخالفت و صکره
ضروری موافقت ایلدیگی حالده عاقبت براق النده مظلوماً قتل اولندیغی
وینه او یونده مهرجهان دینیلان ملکه سلجوقینک جلال الدینه برگور شده

مفتون اوله رق زوجی اتا بکک کندینه براقیدنی اختیاری استعمال ایله فسخ نکاح ایتدیرد کدنصکره جلال الدینه واردیغنی بیان ایدرلرکه بواساسلر بعض تغییرات ایله تصویر اولندی .

زاهره نك شفقت مادرانه سنه و مهرجه نك احوال عاشقانه سنه دائر اولان و خیالات ایله نیره و مهرجه نك آره سنه گوستریلان و او یونك محبتنه دائر هر درلو حسیات فاجعه سنی یکدیگرینه ربط ایله جلال الدینك مشاق روحانیه سنی تحمل اولنه میه حق بدرجه یه ایصال ایدن مشابهت بتون بتون محصول خیالدر .

تیارولرک تاریخه و حتی ایکی مسلکدن برینه درجه موافقتدن بر قاج قات مهم برجتهی واردرکه اوده اشخاصك تصویر اخلاقدر؛ ظننه گوره اثر عاجزانه مدده هر شیدن زیاده بومسئله شایان نظر گورینور. هر تقدیر الله ایران و تورانك اوزمانده کی اخلاق و عاداتنه دائر مکملجه معلومات آله حق کتابلر موجود دکلسه ده تاریخلردن استنباط اولنان علم اجمالی یه نظر آتیارونك رکن اصلیمی اولان جلال دها بشقه یوللرده تعریف اولغق لازم گلور گبی ظن اولنور. مثلا روضه الصفایه باقلسه اوقهرمانك فضائل یالکتر شجاعتنه منحصر اولدیغندن سر بدادیه دن وحیه الدین و یا کاشغر ملوکندن میرزا ابوبکر گبی برشی اولسی خاطره گلیر .

جلال الدینك خصمانندن برخاندانه منسوب اولان ابی الفدا ایسه پادشاهی انواع سیئات مظالم ایله اتهام ایتمش و حتی برملکینی یک نظرده محبتنه مبتلا ایدن و اکثر تاریخلرده اوصاف و تعریفاتی گوریلان و جاهت و جمالنی بیله اقبح مخلوقات صورتنده گوسترمک استمش اولدیغندن اگا اینانلسه جلال الدین ده جنگیرک بر بشقه درلوسی اولدیغنه حکم اولنور .

فقط تاریخك حاوی اولدیغی وقایع مورخلرک علاوه ایتدیگی مطالعه لردن بیك قات زیاده ناطق حقیقت اولدیغندن جلال الدینك افعالی بواسناداتک تمایله تکذیبه کافیدر .

مرحومك ترجمه حلی بر کره پیش نظره آنیرسه کندیسنک
جهانگیره فائق و فوق العاده یار دیلان اعظم ایچنده دخی بر موقع امتیاز
واستثنای حائز اولدیغنی تسلیم ایتمامک عقل ایچون ممکن اوله ماز .

بر زمانده که جنگیرک دغدغه قهر و دهشتی ایران و توران خلقتی ذل
و جہانتک اسفل درکانه دوشورمش و بلکه عموم انسانیت تاتارک ظهورینی
دفعی محال بر بالای آسمانی قیلندن بئش ایدی . جلال الدین بتون جهانندن
بیوک بر قلبه مالک اولدیغنی اثبات ایدرک پدرندن بر قوری شهزاده لک عنوانندن
بشقه هج برشی بولمادینی حالد خوارزموه، هندو، عراقده، آذربایجانده درت
دولت تشکیله موفق اولق و تدارک ایده بیلدیگی جزوی جزوی قوتلرله اوچ
ملیون عسکره مالک اولان تاتار دولته یگرمیدن زیاده غلبه ایتمک و بر کره
سیف الدینک، بر کره ده برادرینک خیانتله اسباب مکنت و دولتی بتون بتون
محو اولمشکن آرهدن برسنه کچمکسزین بر کرامله معدومه وجود ویررگی
یکیدن دولت، یکیدن اوردولر پیدا ایتمک و بر طرفدن تاتار و بر طرفدن اکثر ملوک
وامرای اسلام و بر طرفدن گورجیلرله اوغراشدینی حالد بالدفاعه بویله
یاری جهان خلقنه قارشو بیوک بیوک ظفرلر قزاقق و اکثر ایامنده خیانتدن
و آنک نتیجه سی اولان پریشانلقدن قورتلماش ایکن ینسه جهانگیر قدر
مملکت تسخیر ایلک آلتی بیک سنه لک عالم انسانیت ایچنده هج منلی گورلماش
اولان وقایع فوق العاده دندر .

جلال الدینده روضه الصفانک گوستردیگی شجاعت نه مرتبه عالی
اولورسه اولسون غایتی احراز ایتدیگی غلبه لر سبب عد اولته بیلیر، یوقسه
برقاج کره اوغرا دینی محو و اقراض حالتدن صکره فلکک پنجه سنی بوکمه
اوغرا شرجه سنه محیر العقول اقدامات ایله حاصل ایتدیگی امیدسز نتیجه لر
انسانک شجاعت فطریه و یا مهارت عسکریه ایله وجوده کتیره بیله جگی
خارقه لردن دکلدر .

حرص جاه گبی، کبر نفس گبی، داعیه انتقام گبی الک بیوک وقایعک

الك بيوك سائق لرندن اولان امراض نفسانيه نك هيچ برنده فتور و تحولدن مصونيت خاصه سي موجود اولديني بالتجربه مثبت بولنديغندن جلال الدينك مائريني شجاعته دكل شجاعته دن بيك قات شديد التأثير اولان اسباب مشروحيه بيله اسناد ايتكم معقول اوله ماز. زيرا افغاندن بالبداهه ثابت اولمقده دركه تا برچوق عوارض جسمانيه سنك تأثيريله روحنده كي قوه فوق العاده بتون بتون زواله دوشونجهيه قدر مرحومك همتي يأس و تغيردن بري ايدى .

هله ابوالفداتك ظلم افتراسي باهر البطلان اولان رواياتندرد . چونكه اوزمانلرجه بر ظالم ايچون او قدر يرلرده انفاذ حكم ايديه سلك جنگيز گي حقه تدعبدرجه سنه وارمش بر عصيت نوظهوره تمسكه حاصل اوله بيليردى . جلال الدينك ايسه اويله بر عصيتي دكل كندينه وفا ايديه جك وحتي خيانت ايتيه جك بر كيسه ايله قرابتى بيله يوق ايدى . بوندن بشقه مرقومك اوغرا ديني يرلرده بيك استكراه ايله ظاهري بر اطاعت گوسترن امرايه واشد خصماسي اولان ناسر طرفدن اوزرينه سوق اولنوبده يد غالبه سنه اسير اولان مظفر الدين ايله توابعنه اوزمانلرجه مثلي گورلماش بر معامله عفو و احسان ايله مقابله ايلديكي و بوقدر متاعب حرب و فلاكت آره سنده دولتي تايد ايچون ايران و هند و تورانك هر طرفي طولاشمه مجبور اولمشكن اخلاطدن بشقه بر اسلام شهرينك عنوة ضبطنه رضا ويرمديكي و برادري غياث الدين بر قاچ كره مقام و بلکه حياتنه قصد ايتمشكن كنديسي دائما غياث الدينك تلطيف و تربيت و اقبال و راحتته چالشديني و سيف الدينك آتكم باشنه بر قامچي اورلديغندن طولاي عصيان و خيانت حاضرنديغني هر طوريله گوسترمش ايكن شمير جهادينه آتكم بيله قاني بولاشد يرمق استمديكي تاريخجه مسلم اولان حقايقندرد . بو مسلكده ، بو فطرتده اولان بر قهرمان علوى نهاده نصل ظلم تصور اولنه بيلير ؟ مرحومك مفاخر جليله سني - گوگلمه و يرديكي مفتونيتدن طولاي - بر تياروده تصوير ايتكم آرزو سننده بولنديغ صره ده انسانيه كي موهوبات

طبیعتك هیچ برنده اوقدر آثار فوق العاده به علت اوله حق قوت گورمه مامش
وگرك تتبع وگرك محاکمه ایله نه قدر اتعاب ذهن ایلمسه فضائل مکتسبه
و ملکات علویه نك اعظمی اولان وظیفه پرورلك مقتونیتدن بشقه اوقدر
جلال افعاله برحرك بوله مامشدم . معارف شرقیه ایله اوغراشان اوروبا
مؤلفارینك خلاصه تدقیقاتنی بوفکره یقین گورردم ؛ فقط بزم تاریخلرده
دوشوندیکم حقیقتی تعیین ایدر برصراحت بوله مدیغم ایچون استدلالی
برحکم قطعی صورتنده عد ایتمگه جسارت ایده مزدم .

عاقبت بر مجموعه ده کمال اصفهانینك بعض مکتوباتنه تصادف ایتمدم که
جلالک افعال و اخلاقی مصور ایدی . اوادیب صاحب فضائل ، جلال .
الدین ایرانده بولندجه مجلس اقبالنه مداوم اوله رق زمانك عادتنه اتباعاً
آره صره بعض قصائد ایله پادشاهك توصیفنده بولندیغنی گبی احبابنه یازدیغنی
کاغدلرده دخی پادشاهك عشرته انهماك و حلم و عفوده افراطنی بکٹامکله برابر
اسلامیت غیرتنده اولان اقدامی اصحاب و تابعین ادوارینی آدیره حق
درجه لرده بولندیغنی و مجلسنده ملتك نجاتنه چاره تحریسندن خالی بر دقیقه
گذار ایلدیغنی بیان ایدر .

کمال الدینك بعض محرملرینه یازدیغنی و حسناتدن بحث ایتمدیگی
صره ده فنا گوردیگی شیلرك دخی تعدادندن چکغدیگی مکتوبلرینی مبالغه
و یا مداهنه به حل ایچون بر سبب عقلی موجود اولدیغندن پادشاهك حالی
رأی العین گورمش اولان اوله بر فاضل حقیقت شناسك شهادتی جلال .
الدینك حالخه اولان تخمیننی حکم درجه سنه ایصال ایلدی . بناء علیه
او قهرمانی ، مقصدی اعزاز دینه و اتباعی وظیفه پرورلكه منحصر بر وجود
اولق اوزره تصویر ایلدم . ظن ایدرم که بوضورت مرحومك شمائل معنویاتنه
عینی عینه توافق ایدر .

دین الهینك شرفه برقرن اهالیسندن زیاده خدمت ایتمش و بیک
درلو مصائب طاقتگذار ایچنده اودینك مجزه ذی حیاتی عد اوله حق قدر

خارقه لره مظهر اولمش بر ذات عظیم الاقدارک روحنده کی قدرت و مزیتی
تصویر ایتمک آرزوسنی پیش نظره آلدیقه فکرک بیوکلیگی گوکلیمی بر عجز
ودهشت ایچنده بر اقدردی. حتی تیار و نوعندن اولان سائر آثار عاجزانه مک
الک بیوکلی یازمق ایچون بر هفته دن زیاده اوغراشم دیغم حالدده بوتالیف المده
ییللرجه سورندی. مع مافیہ وجدان. ینه اویوکلیکک حاصل ایتدیگی شدت
شوق و آرزویه غلبه ایدمه یه رک اثرمک اکالنه جسارت ایلدم.

جلال الدین صورتاً شرق پادشاهلرندن ایسه ده حقیقتده اسلام
قهرمانلرندن اوله رق آنک اخلاقی تصویر اخلاق اسلامیہ فی تحریر دیمک
اولدیغندن مرحومدن بحث ایدن بواتر ده ایران و تورانک افکار و عاداتنه حصر
نظر ایتمک اعتقاد عاجزانه مده عبث گورندی. و بناء علیه جلال الدینک تمثال
ماهیتی - اکثر احوالی یالکیز زمانیلر قائم - بر عضرک صاحبی دکل - کندی
ابتداسندن جهانک انتہاسنه قدر دائم - بر تربیه نک حمیت دینیه و مصالح
دنیویه ده مثال مجسمی اولمق اوزره تصویر ایلدی. اویونک نهایتلرینه
طوغری جلال الدینک متانت آهندالاه سنده بدرجه یه قدر تناقض اثرلری
گورنگه باشلار ایسه ده بو تغیرک نتیجه یه وصول ایچون نه قدر لازم، نه قدر
طبیعی اولدیغی ده ادنا ملاحظه ایلر آکلاشیلیر.

جلال الدین اخلاق عالییه و اطوار مردانه ایلر متحلی بر خاندان
عزت و شان پرورده لرندن اولدیغنه و عائله سنک اکثر اعضاسی گبی کمالات علمیه
و طبیعت شاعرانه ایلر اتصافی تاریخیجه مثبت بولندیغنه بناءً مرحومک
تصویر معنوی سنده طبیعت و قایع مساعد اولدیقه او مزیتانک دخی
ابرازینه چالشدی.

ممدوحک شاگردان کالنه نمونه اولمق و وقعه نک عوارضی بر برینیه
ربط ایدرک جریانی تسهیل خدمت ایتمک ایچون نقش ایتدیگم درت تمثال
حمیتدن اوز بگی مقتدای مبارک لرینک فداکارلغندن، قهرمانلغندن، اورخان
تدابیر عسکریه مهارتیه دنیات زمانیه قارشی شدت نفرندن، ملک نصرتی

دریا دلالکندن، مرو شدن، نورالدینی ادراک حقیقت و فکر حکمتدن مستفید
 گوسترمک ایستدم. و خوارزمشاه دولتک پادشاهلری، شهزاده لری گبی
 امراسی ده هان علی العموم اصحاب معرفدن اولدقلریچون سوزلرینی ده تارنخچه
 مثبت اولان مکسوبات علیه لرینه توفیق ایلدم. .
 بودرت ذاتک هر برینه برآیری مزیت ویرملکه برابر تقیضلری شرف
 اسلامیتدن و تربیه لری برمسلك حمیتدن اولمق جهتیه برنده موجود اولان
 فضائلی کافه سنه شامل و فقط هر برینک مخصوص اتسندن اولان بیوکلکلی
 مزیات سائر سیه غالب گوستردم.

برده تابعلر متبوعه بتون بتون مدانی اولماق ایچون اوز بگک فدا-
 کارلغی، قهرمانلغی تلاش و انفعال ایله، اورخانک مهارت عسکریه و نفرت
 دنیاتنی ترتیبات حرییه و جزای مجرمین امرنده زیاده جه شدتله، ملک نصرتک
 مروتنی، دریا دلالکنی سریع الزوال برتهورله، نورالدینک حقیقت بینلگی، فکر
 حکمتی قاعدهیه قارشى فائده تحریسندة جزوئی ضعف ایله تعدیل ایلدم .
 اوزبک و اورخان و نصرت و نورالدینک تمایل ماهیتی بادی نظرده
 بر برینه پک مطابق گبی گورینورسه ده بالاده عرض ایستدیگم دقیقه لر
 دوشونیلیر ایسه بر برینی آندیرر و فقط هیچ بری دیگرینه بگزه مز درت
 برادرگی بر قاج علائم خاصه ایله یکدیگرندن تماماً تمایز ایلدیگی پک
 قولای آکلاشیلیر .

روضة الصفاده ملک نصرتله غیاث الدینک سپاهی ماجراسی شو
 صورتله تحریر اولغشدر « درائنای این اوقات شخص از سر هنگان غیاث الدین
 پیش ملک نصرت که یکی از خواص وندماء سلطان بود رفته ترك ملازمت
 اوگرفت و سلطان غیاث الدین در خاطر نهان میداشت تاروزی در مجلسی
 شراب باملك نصرت خطاب گر ددکه چرا مقرب مارا بخدمت راه داده
 چو مطایبه برمزاج ملك نصرت غالب بود بطریق هزل گفت که سرهنك را
 نان باید تا خدمت کند »

تاریخک بوافاده سنه باقیلیرسه ملک نصرتی مروته، دریا دلالکه
 دگل ظرافت و میل لطائفه تصویر ایتک اقتضا ایدر. و بوضورت ایسه
 برچهره تبسم ریز ایله براکنجه پارچه سی وجوده گتیره جکندن اوجهت
 التزام اولنسه اثر عاجزانه م ظاهرده ده پارلادیله بیلردی؛ فقط جلال الدین
 گبی فضائل اسلامیه قدر اعز برقهرمانک محالس عزم و حمیتیه مزاحی
 یاقیشدیره مدیغمن و بودرلو آثار تخیلنده ایسه حقیقتدن زیاده مشابعت
 حقیقت ملترم اولدیغندن نصرتک بذله گولغنی او فطرتک متقار بلرندن اولان
 اطوار دریا دلانه یه تحویل ایلدم: طبعه هر وقعنه ک برده فرحلی جهتی
 اولقی لازم گیرسه ده جلالک موضوعنده اولان علویت وجدیتیه نظراً
 اکنجه سنی مهر جهانک افادات عاشقانه سنده اولان کشایشله، براق حاجیک
 محاورات خیانتیه فضائل انسانیه ایله استهزا ایدر یوللو کوستردیگی زهر
 خنده لره حصر ایتک مجبوریتده بولندم.

موضوعک سوقه اتباعاً مباحث افعالریله صحیفه لر طولدیرمغه مجبور
 اولدیغم ناصر عباسی و ملک اشرف اتوبی و سلطان کیقباد سلجوقینک
 ماهیتلرینی تعیین ایچون یازیلان سوزلرک اساسلری بتون بتون تاریخلردن
 آلمش و تفصیلاتی او اساسلردن انبعاث ایتدیرلشدیر. غیاث الدینک اخلاقی
 برخدمتکار منازعه سیحون قاتلکی برضرر واهمه سیله برادرینه قارشی مشرک
 پرورلکی ارتکاب ایتمندن استخراج ایتشدیم. براق حاجیک ائنده نصل تلف
 اولدیغنه دائر تاریخلرده تفصیلات گوره مدم حقنده تصویر ایتدیگم اذیتلر
 ایسه سیئات افعاله نسبتله یک بیوک اثر شفقت عد اولنه بیلیر. فقط او
 داناشده بولنان بر انسانه گوره دنیاده هر نه یاپلسه اولوم قدر مدهش اولیه.
 جغسندن جانی ایچون ده زیاده تأثیری اوله میه جق و بناء علیه اصحاب
 فکرک تشفیسنه خدمت ایده میه جک برطاق وحشیانه اشکنجه لر تصویر ایدوبده
 بحق جزا گورن آدمی مرسته شایان برحاله کوسترمک ایتسدم.
 (مابعدی وار)